

Filipae

Nægkiariien sə rani mə nəfe i nəkukuə

Ia nuk i 60, Pol ramarə ia kalapus fwe Rom nənə mirai nəkukuə me i Filipae, Kolosi, Filimon, mine Efesas. Nəkur Filipae hərəhi pen Epaftaetas ruvehi nari riti mevən muvei pen m Pol. Nəpın Epaftaetas ramarə fwe Rom, in ramemhə pık. Nənə nakalasia me fwe Filipae rerınraha rəpou tukwe. Nəpın in rəsanın, Pol rərhi pen in ruvehi nəkukuə i mevən fwe Filipae. Pol rokeikei pık nakalasia me fwe Filipae. In raməgkiari mınraha rəmwhen mə in tata səvənraha. Pol rini tanak mınraha ti nokeikeiien mine nasituien səvənraha. Nəri auər a Pol ramarə fwe ia kalapus, mətə səvənhi nəkukuə raməgkiari pık ia nagienien. Nəpın rıpık nəkukuə i raməgkiari ia “nagienien” mine “nəgnəginiien.” Pol rini irapw nətəien səvənhi ia nıkaren səvəi nımıruien səvəi ipwet mine samarə irə ia təkure tıprənə i. In rini mə, “Trini mınuə iakimıru, nımıruien səiou in səvəi Kristo. Nənə trini mınuə iakemhə, ramasan pık anan mwi” (1:21). Rəmwhen ia nəkukuə me pam səvənhi, ia nəkukuə i Pol rauvehi utə nətərigien səvəi nakalasia me, maməvəhag mınraha mə irəha tuhaməkeikei mharə pwəh nətərigien səvənraha kuatia. Irəha tuhaməkeikei mharə mamho nəkwei Kumwesən.

Nægkiariien sə rakupwən

¹ Iou Pol mine Timoti, kimrau iarmama mi sāvai Iesu Kristo iarauo tukwini nari min.

Nəkukuə i rauvehe tukumiaha pam nərmama me sāvai Iesu Kristo səməme hiamarə ia taon nəha Filipae, mauvehe mwi ti nəmə asori me nəha kamhətui amasan tukumiaha mine tikon me.

² Pwəh Kumwesən Tata səkītaha mine Iesu Kristo Iərimənu səkītaha trouəriari pehe namasanien mine nəmərinuien m kimiaha.

Pol raməfwaki m Kumwesən ti nəkur Filipae

³ Nəp̄in me, nəp̄in rerik ramrhi kimiaha, iakani tanak m Kumwesən tukumiaha. ⁴ Nənə nəp̄in me pam, nəp̄in iakaməfwaki tukumiaha, iakaməfwaki rerik ramagien ⁵ ti nəri nə mə fwe iakinərer vi a mani irapw nəgkiariien amasan muvehe meste pehe ipwet mine saməuvehi pəri rəgitaha me tukwe. ⁶ Nənə iakukurən amasan mə Kumwesən sə rino stat ia noien amasan ia kimiaha, in traməkeikei mamə noien nəha mamevən meste tro sampam irə ia nəp̄in sə Iesu Kristo truvehe irə.

⁷ Nəp̄in me rerik ramrhi kimiaha, nənə ratukwatukw a mə iakamo iam̄nhi irə, ti nəri nə mə kimiaha pam hiamasitu ia nirak ia wok i Kumwesən r̄iməuvei pehe miou ia namasanien sāvənhi mə tako. Nənə nəp̄in iakamarə ia kalapus, mine nəp̄in iakamərer irapw ia nəmri nərmama, maməvisau mə nəgkiariien amasan ro n̄ip̄ərhienien i, kimiaha hiamasitu ia nirak ia wok i. ⁸ Kumwesən rukurən mə nəgkiariien i iakani ro n̄ip̄ərhienien. Iakokeikei mə takətoni kimiaha ti

1:1: Wok Me 16:12-40 **1:2:** Rom 1:7, Kal 1:3, Flm 3 **1:3:** Rom 1:8, 1Kor 1:4 **1:6:** 1Kor 1:8, Fil 2:13 **1:8:** Rom 1:9, 2Kor 1:23

nəri nə mə iakokeikei pik kímiaha rəmwhen a ia Iesu Kristo rokeikei kímiaha.

⁹ Nənə in i nəfwakiien səiou mə nokeikeien səkímiaha truvehē masori mwi irəhar nukurəniēn mine nəkiri amasanien nari tuharuvehē mharasori ia kímiaha ¹⁰ mə kímiaha hiəukurən nətə sasien nəfe noien ramasan pik mə tiho. Nənə ia noien nəha kímiaha tihəmher, tukəpwəh nətoniēn noien ərəha riti ia kímiaha ia nəpīn sə Kristo truvehē irə, ¹¹ kímiaha tihəukuər ia noien atukwatukw me səməme Iesu Kristo rino həukuə ia kímiaha, nərmama tuhətoni mhəuvehi utə nəghi Kumwesən mhəgnəgini in tukwe.

Pol in fwe ia kalapus

¹² Piak me, iakokeikei mə tihəukurən mə iakamarə ia kalapus, mətə noien i rinasitu pik mo nəgkariēn amasan səvəi Kristo ruviris mwi mamevən. ¹³ Ro pen naruagən me səməme kamhətui ti nimwə səvəi Kig Sisa mine nərmama həpik mwi həuvəukurən raka mə iakamarə ia kalapus ti nəri nə mə iou iərmama riti sə iakamo tukwini nari m Kristo. ¹⁴ Narəien səiou ia kalapus ramasitu ia piəvtaha me həpik, mamō irəha hahətətə əknekīn mwi ia Iərimənu səkitaha, nənə mamō nətərigiēn səvənraha riskai ti nini irapwien nəgkariēn səvəi Kumwesən mhəpwəh nehekiriēn.

¹⁵ Nipərhiēniēn nepwīn kamhəni irapw Kristo ti nəri nə mə irəha kamhəmwəki iou nənə mhokeikei mə irəha tuhasori ia nirak. Mətə nepwīn kamhəni irapw Kristo ia nətərigiēn amasan. ¹⁶ Nərmama

1:10: Hip 5:14, Fil 1:6, 2:16, 1Tes 5:23 **1:11:** Jon 15:8 **1:12:** 2Tim 2:9 **1:13:** Wok Me 28:30, Efes 3:1

me i nətərigien səvənraha ramasan irəha kamhəni irapw Kristo ti nəri nə mə hokeikei iou, nənə mhəukurən mə kinəmri iou iakamarə ia kalapus mə takərer irapw ti nəgkariien amasan səvəi Kristo mə ro nipərhiēnien i. ¹⁷ Mətə nepwīn səməme kamhəmwəki iou həpkini irapw mhə Kristo ia rerīnraha pərhiēn. Irəha kamho iamīnhi irə mamhokeikei mə tuhəuvehi utə atukw a irəha, nənə rerīnraha ramrhi mə tuho nərəhaiēn miou nəpīn iakamarə ia kalapus. ¹⁸ Mətə nəri auər a mə kamho ia noien atukwatukw uə rekəm, mətə kamhəni irapw Kristo nənə ro iamīnhi irə iou rerik ramagien.

Pərhiēn, nənə takagien mwi ¹⁹ ti nəri nə mə iakukurən amasan mə nəri i tro Kumwesən ruvehimīru iou ia nəfwakiēn me səkimiāha mine nasituiēn səvəi Nənimwīn səvəi Iesu Kristo. ²⁰ Iou iakukurən amasan, maməmri pen əknekīn nətərigien səiou ia Kumwesən, mə in trəpwəh nəseniēn iou iako nari riti takauris tukwe. Iakokeikei mə ia nəpīn me takətigase rəmwhēn iakamo təkwtəkwuni, nənə nəri auər a mə tukini mə takimīru uə takemhə, mətə noien sə iakamo ia nīpwrak truvehi utə nəghi Kristo. ²¹ Trīni mīnuə iakimīru, nīmīruēn səiou in səvəi Kristo. Nənə trīni mīnuə iakemhə, ramasan pīk anan mwi. ²² Trīni mīnuə iakəpwəh nemhəiēn, iakukurən noien wok me nepwīn sə trukuwə kwənkwan. Mətə iakreirei mə sə pəku nəha iakokeikei. ²³ Təkwtəkwuni nəha nətərigien səiou ro kəru. Iakokeikei pīk mə takemhə, məpwəh nīpwrak, nənə marə kīmrau Kristo. Iakregi mə sə nəha

ramasan pik məpi raka. ²⁴ Mətə iakətoni mə narimnari me nepwin nəha takaməkeikei mo masitu ia kimiaha, ro pen iakukurən amasan mə tapkəmhə mhə. ²⁵ Ti nəri nə mə iakukurən mə nəri i ro niperhienien, nənə iakukurən mə takamiru a maripin mamarə kitaha m kimiaha pam, nənə mamasitu ia kimiaha mə tihəuverə mwi, nənə rerimiaha tragien mwi ia nahatətəien səkitaha. ²⁶ Ro iaminihə irə kimiaha tihəukurən nəgnəgini pikien mwi Iesu Kristo tukw iou, ti nəri nə mə takuvehe mwi tukumiaha.

²⁷ Mətə nəri kuation i mə pwəh narəien səkimiaha hiamarə irə ratukwatukw amasan mesi pen nəgkiariien amasan səvəi Kristo. Nənə nəri auər a mə takuvehe mətoni kimiaha uə takəpwəh nuveheien, mətə pwəh iakregi mə hiamərer əknekən ia Nənimwin kuation, nətərigien səkimiaha kuation, hiamousari pəri mə tihəsitu ia nərmama mə tuhəhatətə ia nəgkiariien amasan, ²⁸ nənə mhəpwəh nehekiriien ia nərmama səməme haməmwəki kimiaha. Noien nəha tiho ro nimitəien i irəha tuhətoni mhəukurən mə tukouraha irəha, mətə tukuvehimiru kimiaha, nənə nəri i ruku pen ti Kumwesən. ²⁹ Iakani iaminihə irə ti nəri nə mə kinəsəni pehe m kimiaha mə kimiaha nərmama hiaməni niperhienien ia Kristo mamho tukwini nari min, mətə kinəsəni pehe mə kimiaha mwi tihəuvehi nəmisəien tukwe. ³⁰ Kimiaha hiamregi nəmisəien sə hianətoni kino miou fwe kupwən, nənə təkwtəkwuni hiamregi mə kamo ihi nəmisəien nəha miou. Rəmwhən mə kitaha samaruagən pəri ia naruagəniien riti.

2

Nətərigien səkitaha traməkeikei məmwhen ia nətərigien səvəi Iesu Kristo

¹ Rerimiahaha riskai ia Kristo ti nəri nə mə hiəuvəuvehe mhəno kuatia kimiaha min uə rekəm? Ouəh! Hiamregi ramasan ia nokeikeien səvənhi uə rekəm? Ouəh! Nənimwın Ikinan ramarə ia kimiaha uə rekəm? Ouəh! Hiamo ramasan m kimiaha me nənə mamhapi tukumiaha me uə rekəm? Ouəh! ² Mə ro iamınhi irə iakokeikei mə tiho rerik pwəh ragien mwi. Kimiaha pam tihaməkeikei mhəuvehe mho kuatia ia nətərigien səkimiaha, mho nokeikeien m kimiaha me, mho pəri nari ia nətərigien kuatia rəmwhen mə kimiaha iərmama kuatia. ³ Tihəpwəh noien nari riti ia nətərigien səkimiaha əpa, uə mho mhəuvehi utə kimiaha irə, mətə tiheiwaiu nənə mhətərig ia kimiaha me nepwın rəpi raka kimiaha atukw. ⁴ Nənə tihəsitu ia kimiaha me ti nimiruien me səkimiaha. Ripkamasan mhə mə iərmama riti ramətui amasan ti nimiruien əpa səvənhi.

⁵ Nətərigien səkimiaha traməkeikei məmwhen ia nətərigien səvəi Iesu Kristo:

⁶ Nipərhienien in Kumwesən pərhiən,
mətə in ripkəmwur mhə mə trəkwtəmhiri
əknekın noien nəha sə in mine Kumwesən
krouəmnəmwhen a,

⁷ in rəmri karen nasoriien səvənhi,
muvehi noien səvəi iərmama sə ramo tukwini
nari,

mətui pehe ia tɪprənə i nɪpwran rəmwhen ia
nɪpwrai nərmana.

⁸ Nənə nəpɪn kamətə in mə ramarə ia narəien səvəi
iərmana,

in ruvehi irapw atukw in,

mamo nəkwai Kumwesən ia narimnari me
pam meste memhə, nɪpərhiendien remhə ia
nei kamarkuau.

⁹ Ro iamɪnhi irə Kumwesən ruvehi utə in revən fwe
irənhə anan,

muvei pen nahag min sə rəpi raka pam nahag
me,

¹⁰ mə ia nəghi Iesu narimnari me pam səməme
kamhəmɪru ia kwopun me pam ia
neiai, mɪne tɪprənə, mɪne Imwei Nəkur
Həuvamhə,

tuhənimwi nukurhunraha mhəuvei pen
nɪsiaien min,

¹¹ nənə irəha pam tuhəni irapw mə Iesu Kristo in
Iərɪmənɪ,

nənə noien nəha truvehi utə nəghi Tata
Kumwesən.

*Nərmana me səvəi Iesu Kristo kamhəsər
rəmwhen ia kaməhau me*

¹² Nərmana keikei me səiou. Nəpɪn iakamarə
ihi kɪtaha m kɪmiaha, hiamo nəkwak ia nəpɪn me.
Nənə təkwtəkɪwuni nəha iakamarə isipwɪn tukumi-
aha, kɪmiaha tihaməkeikei mhousari mho nəkwak
mamhəuvən. Tihəhekɪr mhətəmnɪmwɪn mamho
narimnari me nəha Kumwesən rɪməuvehimɪru
kɪmiaha tukwe. ¹³ Iakani iamɪnhi irə tɪ nəri

2:8: Rom 8:3, Jon 10:17, Hip 5:8, 12:2 **2:9:** Wok Me 2:33, Efes
1:20-21, Hip 1:3-4 **2:10:** Rom 14:11 **2:11:** Rom 10:9 **2:12:**
Sam 2:11, 1Pit 1:17 **2:13:** Jon 15:5, 1Kor 12:6, 15:10, 2Kor 3:5,
1Tes 2:13

nə mə in nə Kumwesən fwe ia rerimiahā ramo kīmiaha hiokeikei noien narimnari me kamhesi pen nətərigien amasan səvənhi.

¹⁴ Ia narimnari me pam səməme hiamō, tihəpwəh nəgkiari əgkiariien tukwe mhəpwəh nəvisəien m kīmiaha me tukwe. ¹⁵ Ia noien nəha kīmiaha nīpwnəti Kumwesən me tihatukwatukw, mhəmher, tukəpwəh nətoniien noien ərəha riti səkīmiaha nəpīn hiamarə ia kurkwai nərmama ikou me səməme kamho noien ərəha. Ia rerīnraha kīmiaha hiaməser mhəmwhen ia kəməhau me ia nīmagouagou, ¹⁶ mamhəuvei pen nəgkiariien səvəi nīmīruien mīnraha. Kīmiaha tiho iamīnhi irə mə nəpīn sə Kristo truvehe irə iou rerik tragien tukumiahā, nənə iakukurən mə iapkaiu auər a mhə uə iapkisese auər a mhə. ¹⁷ Nahatətəien səkīmiaha rəmwhen ia nari riti hiaməuvei pen m Kumwesən kauvani ia təkure nīfatə. Trīni mīnuə kousi əpune iou nītek raiu rəmwhen ia waen kətəgi irapw ia nəri nəha, mətə iou iakokeikei a mamagien kītaha m kīmiaha. ¹⁸ Nənə ia noien kuatia kīmiaha tihaməkeikei mhokeikei a mamhagien kītaha miou.

Timoti mine Epafrotaetas

¹⁹ Trīni mīnuə Iesu Iərimənu səkītaha rəsēni, iakokeikei mə trīpkō mhə tui iakərhi pehe Timoti ruvehe mətōni kīmiaha mə nəpīn in rīrərig muvehe məvisau pehe kīmiaha miou, nənə iou mwi rerik tragien. ²⁰ Iərmama riti mwi riwən ia kwopun i nətərigien səvənhi rəmwhen ia səvəi Timoti, in rerīn ramrhi pīk kīmiaha. ²¹ Nərmama əpə me kamhətərig a ia wok me

2:17: Rom 15:16, 2Tim 4:6
4:10

2:18: Fil 3:1, 4:4

2:21: 2Tim

səvənraha, mhəpwəh nətərigien ia wok səvəi Iesu Kristo. ²² Mətə Timoti noien səvənhi ramasan pik. Kimiaha hiəuvəukurən raka mə in ramasitu ia nirak ia wok səvəi nəgkiariien amasan səvəi Kristo rəmwhen iəkunouihī ramo wok irau tata səvənhi. ²³ Ro iamīnhi irə rerik ramrhi mə nəpīn iakukurən mə nari riti tro iou, iakərhi pehe in ruvehe mətoni kimiaha. ²⁴ Nənə iakətigite ia Iərimənu səkītaha mə tripkko mhə tui iou mwi iakuvehe mətoni kimiaha.

²⁵ Mətə rerik ramrhi mə takaməkeikei mərhi pehe Epafrotaetas rirərig muvehe mətoni kimiaha. In piak sə kimrau min iarauo pəri wok nənə rauaruagən pəri. Fwe kupwən hiənərhi pehe in ruvehe muvei pehe narimnari me nepwīn masitu ia nirak irə ia nəghimiaha. ²⁶ In rokeikei pik mə trətoni pam kimiaha. In ramregi rərəha anan ti nəri nə mə hiəregi mə in ramemhə. ²⁷ Pərhiēn nemhəien riti rīməuvehi ipaka remhə, mətə Kumwesən rapi in mapi mwi iou nənə momasan in ia nemhəien səvənhi. Mətə trini minuə rīmamhə pərhiēn iou takregi rərəha pik anan mwi. ²⁸ Ro iamīnhi irə iakokeikei pik mə takərhi pehe in nəpīn hiətoni rerimiaha tragien mwi, nənə iou mwi nətərigien sə iakamregi rərəha irə tukumiaha truvehe miwən. ²⁹ Ro iamīnhi irə nəpīn in truvehe tukumiaha, kimiaha tihaməkeikei mhəsevər ia rerimiaha tukwe ia nəghi Iərimənu səkītaha mhagien asori. Nənə tihəuvei pen nisaiēn m nərmama sə ro me iamīnha irə, ³⁰ ti nəri nə mə ipaka in remhə ti wok səvəi Kristo. In rīpkhekīr mhə ti nīmīruien səvənhi ia nəpīn skai me mə trasitu ia nirak nəpīn

suatuk səkimiaha riwən ti nasituien.

3

Kitaha saməfiutə kitaha ti Iesu Kristo əpa

¹ Piak me, iakuə takəgkiari ia nari riti mwi. Kimiaha tihaməkeikei mhagien ti Iərimənu səkitaha. Iou iakuvəni raka nəgkiariien me i tukumiaha fwe kupwən, nənə təkwtəkwuni iakamrai pen mwi ia nəkukuə i. Ripkiskai mhə tukw iou ti noien ti nəri nə mə iakukurən mə trasitu ia kimiaha.

² Kimiaha tihaməkeikei mhəsiari ti nərmama me nəha irəha həmwhen ia kuri me. Tihaməkeikei mhəsiari ti nirəha ti nəri nə mə noien səvənraha rərəha. Irəha kamhəni mə tukaməkeikei kuvehi ninhum m nərmama ti nahatən penien mə irəha nərmama me səvəi Kumwesən.^a ³ Mətə kitaha i nərmama pərhien me səvəi Kumwesən səməme Nənimwīn səvənhi ramarə ia reritaha mamə kitaha saməfwaki ia nīpərhienien. Kitaha saməfiutə kitaha ti Iesu Kristo əpa, səpwəh nətigite ananien ia noien me kīno ia nīpwrataha iruə. ⁴ Nīpərhienien iou iakukurən nəfiutəien iou ti narimnari me iamīnha irə.

Trīni mīnuə iərmama riti nəha rerīn ramrhi mə in rukurən nəfiutəien in ti nīpwran, iou iakukurən nəfiutəien iou məpi raka. ⁵ Kaha me səiou irəha nəkur Isrel atukwatukw, nənə

3:1: Fil 2:18 **3:2:** Sam 22:16,20, Rev 22:15 **a 3:2:** Nərmama nepwīn nəha irəha kamhəuvehi ninhum m nərmama ripko mhə irəha nəkur Isrel mə trahatən pen mə irəha nərmama me səvəi Kumwesən. Mətə aposol me hənī me rekəm, nahatətəien ia Iesu Kristo in suatuk ro ik kuvehe iərmama səvəi Kumwesən. **3:3:** Rom 2:29 **3:4:** 2Kor 11:18,21 **3:5:** Luk 1:59, Rom 11:1, 2Kor 11:22, Wok Me 23:6

iakiməuku pen ia kwənəkwus səvəi Penjamin. Nəp̄in iakinətui muvehi nəp̄in eit, nənə kuvehi ninhum miou. Tr̄ini minuə kani nəkur Isrel atukwatukw me, kwa iou riti ia nirəha. Kupwən iou Farisi riti, nənə iakamesi pen amasan Loa səvəi Moses. ⁶ Iakinokeikei pik nəfwakiiēn səvənraha mamometə nakalasia me səvəi Iesu Kristo. Ia n̄ikaren səvəi natukwatukwien nəha kauvehi raku pen ti Loa səvəi Moses kipkətə mhə noien ərəha riti səiou.

⁷ Mətə narimnari me pam nəha səməme iakinamətigite ia nirəha fwe kupwən nənə rerik rirhi mə hamasan pik anan, mətə təkwtəkwuni nəha iakətoni mə ho a nəri auər a me ia nirəha ti nəri nə mə iakukurən narimnari me Kristo rino. ⁸ Mətə ripko mhə sampam ia kwopun nəha. Təkwtəkwuni iakətoni mə narimnari me pam ho a nəri auər a ia nirəha ti nəri nə mə iakətoni nari riti sə in ramasan pik anan in i mə iakukurən Iesu Kristo lərimənu səiou. Iakinəpwəh narimnari me pam nəha ti Iesu. Iakətoni narimnari me pam nəha həmwhen ia nəri pein. Iakinaraka ia nirəha mə iou iakukurən nuvehien Kristo, ⁹ nənə tukətoni iou mə iou iərmama riti sə iakiməuvehe mo kuatia kimrau min, iapkatukwatukw mhə ia nəmri Kumwesən ia n̄iskaiien atukw səiou ia noien səvəi nesi penien Loa, mətə iakatukwatukw ia nənimen ti nəri nə mə iakamahatətə ia Kristo. Nərmama səməme kamhahatətə iam̄inhi Kumwesən ramo irəha həuvehe mhatukwatukw ia nənimen. ¹⁰ Iakokeikei mə takukurən amasan mwi Kristo mine n̄iskaiien sə rino in rətui mwi ia nemhəien səvənhi. Nənə iakokeikei mə nəmisəien

3:6: Wok Me 8:3**3:7:** Mat 13:44,46**3:9:** Rom 3:21-22**3:10:** Rom 6:3-5, Rom 8:17, Kal 6:17

me sǝvǝi Kristo tuko mwi ia nirak pwǝh iakuvehe mǝmwǝn irǝ ia nemhǝien sǝvǝnhi ¹¹ mesi pen suatuk nǝha meste Kumwesǝn tro mwi iou iakǝtui ia nemhǝien.

Naiuien sǝvǝi Pol

¹² Iou iapkini mhǝ mǝ iakineste raka noien nǝha, uǝ iakinatukwatukw raka, rekǝm. Mǝtǝ ti nǝri nǝ mǝ Iesu Kristo ro iou iakuvehe mo iou iǝrmama sǝvǝnhi, iakamousari mǝ tako noien sǝvǝnhi ruvehe noien sǝiou. ¹³ Piak me, tukwe iou, ia nǝtǝien sǝiou, iapkuvehi raka mhǝ narimnari me nǝha. Mǝtǝ nǝri kuatia i iakamo. Iakamenouenou ia narimnari me ia tǝkutak, iakamǝmwur pik mauvehi niseseien ti nǝri sǝ ramǝmak kupwǝn ia nirak. ¹⁴ Iakamaiu pen atukwatukw ti kwopun tako sampam ia naiuien sǝiou ikin mǝ takuvehi nǝri amasan riti tukuvei pehe miou. Nǝri amasan nǝha in i nimiruien rerin sǝ Kumwesǝn rinǝkwe in kitaha tukwe mǝ tsǝuvǝn fwe irǝnhǝ mhǝuvehi ruku pen ti Iesu Kristo.

¹⁵ Nǝnǝ kitaha pam nǝrmama sǝmǝme sǝuvǝskai raka ia nimiruien sǝkitaha tsamǝkeikei mhǝuvehi nǝtǝrigien me nǝha. Mǝtǝ trini minuǝ kimiaha nepwin nǝtǝrigien sǝkimiaha ropǝ, Kumwesǝn tro pui pehe nǝri nǝha m kimiaha hiǝtoni. ¹⁶ Mǝtǝ nǝri kuatia i mǝ pwǝh sǝkwtǝmhiru ǝknekin nǝfe sǝuvǝuvehi raka mhǝpwǝh narakaien irǝ.

¹⁷ Piak me, kimiaha tihǝuvehe mho kuatia mhesi pen tǝmwki nisuk sǝ iakino raka hiǝtoni, nǝnǝ mhǝtoni amasan sǝmǝme kamhesi pen

3:11: Wok Me 4:2, Rev 20:5-6 **3:12:** 1Tim 6:12,19, Wok Me 9:5-6 **3:14:** 1Kor 9:24 **3:15:** 1Kor 2:6 **3:16:** Kal 6:16
3:17: 1Kor 4:16, 1Tes 1:7, 1Tes 5:3

təmwki nisumaha. ¹⁸ Iakuvəni pehe raka nəgkiariien i tukumiaha nəpɪn rɪpɪk, nənə təkwətəkwuni iakani pehe mwɪ nɪsə nənimək ramaiu. Nərmama həpɪk nəha irəha həpwəh nokeikeiien mə tuhəregi kaməvisau nemhəien səvəi Kristo ia nei kamarkuau. ¹⁹ Ia nəpɪn sampam tukouraha irəha. Kumwesən səvənraha in nə tɪpwɪnraha. Irəha kamhəfiutə irəha ti noien me sə ro a naurisien. Nətərigien səvənraha ramevən a ti narimnari me ia təkure tɪprənə i. ²⁰ Mətə kitaha nərmama imwətaha fwe ia neiai. Kitaha sameitenhi iərmama riti truku pen ikɪn muvehimɪru kitaha. Iərmama nəha in i Iesu Kristo Iərimənu səkitaha. ²¹ In truvsini nɪpwɪrataha i sə rəpou, mo rəmwhen ia nɪpwɪran sə rɪskai mamser. In tro iamɪnhi irə ia nɪskaiien səvənhi sə in ramo narimnari me pam irə səvəi tɪprənə i kamhəsiai in mamho nəkwan.

4

¹ Ro pen piak keikei me kimiaha tihaməkeikei mhərer əknekɪn iamɪnhi irə ia Iərimənu səkitaha. Kimiaha nərmama keikei me səiou iakaməkeikei pɪk mə takətoni kimiaha. Hiamo rerɪk ramagien. Iakamregi ramasan tukumiaha rəmwhen ia iərmama sə kəfəfau pen kəfəfau səvəi nisiaiien irə.

Pol raməvəhag m nəkur Filipae

² Iuotia mɪne Sintike, iakaməgkiari vivi m kimirau mə tirouəmwur mə nətərigien səkimirau truvehə mo kuatia ti nəri nə mə kimirau pəri

3:18: 1Kor 1:23, Kal 6:12 **3:19:** Rom 16:18, Rom 8:5-6 **3:20:** Efes 2:6,19 **3:21:** Rom 8:29, 1Kor 15:28, 1Kor 15:43-53 **4:1:** 1Tes 2:19-20

irouahatətə ia Iərimənu səkitaha. ³ Iakaməres ik mwi, iərmama sə ikino pəri wok krau mik,^a tikasitu ia prən mi i, ti nəri nə mə iakino pik wok kimrahar mınrau, krinouasitu ia nirak rouni irapw nəgkiariien amasan səvəi Kristo kimaha Klemen mine piak me nepwin mwi səməme hənasitu ia wok, nəghinraha fwe ia nəkukuə səvəi nimiruien.

⁴ Tihagien ia nəpin me ti Iərimənu səkitaha. Iakini mwi mə tihagien. ⁵ Pwəh nərmama hətoni noien səkimiaha mə ramasan məpou. Triško mhə tui Iərimənu səkitaha rirərig pehe mwi. ⁶ Rerimiaha trəpwəh nirhi pikien narimnari me. Nəri auər a mə nəri ouihi uə nəri asori, mətə narimnari me pam səməme hiokeikei tihəfwaki tukwe. Tihəfwaki mhəres Kumwesən mhəni tanak tukwe in. ⁷ Nənə Kumwesən truvei pehe m kimiaha nəmərinuien sə rasori pik məpi raka nukurəniien me pam səvəi nərmama. Nəmərinuien nəha trərimənu amasan ia rerimiaha mine nətərigien səkimiaha ti nəri nə mə hiamahatətə ia Iesu Kristo.

⁸ Piak me, nəfe nəghin ro nipərhiien, nəfe nəghin ro nisaiien, nəfe nəghin ratukwatukw, nəfe nəghin rəmher, nəfe nəghin kamini mə ramasan musəpə kamokeikei, trini minuə nari riti nəha ikin ratukwatukw mə tukəgnəgini irə, tihətərig ia narimnari me nəha. ⁹ Nəfe nəghin hiəuvəregi mhətoni iakinahatən kimiaha irə ia nəgkiariien

4:3: Sam 69:28, Luk 10:20, Rev 20:12 **a 4:3:** Kipkukurən mhə mə sin nəha iərmama nəha Pol raməgkiari irə krinouwok irau min fwe taon nəha Filipae. **4:4:** Fil 3:1 **4:5:** Hip 10:25,37, Jem 5:8-9 **4:6:** Mat 6:25-34, Kol 4:2 **4:7:** Aes 26:3, Jon 14:27, Kol 3:15 **4:8:** Rom 12:17 **4:9:** Rom 16:20, 1Kor 14:33, 1Tes 5:23

mīne noien sǝiou kīmīaha tihamǝkeikei mho nǝnǝ Kumwesǝn i in nukune nǝmǝrinuīen tramarǝ tukumīaha.

Pol rǝgnǝgini nǝkur Filipae ti nasituīen sǝvǝnraha

¹⁰ Iǝrimǝnu sǝkitaha ro iou iakamagien pīk ti nǝri nǝ mǝ fwe tui kwopti hiǝpkasitu mhǝ ia nirak, mǝtǝ tǝkwǝkwuni nǝha rerīmīaha ramrhi mwi iou. Ripko mhǝ nīpwrai nǝgkiariīen sǝiou mǝ kīmīaha hiǝnenouenou iou, mǝtǝ suatuk riwǝn mǝ tihasitu ia nirak. ¹¹ Iapkinī mhǝ iamīnhi irǝ ti nǝri nǝ mǝ narimnari me sǝiou riwǝn, rekǝm. Iou iakuvǝukurǝn raka suatuk rerik ramagien a ia nǝpīn me pam nǝri auǝr a mǝ narǝien sǝiou ramasan uǝ rǝrǝha. ¹² Iou iakinarǝ raka ia narǝien i narimnari me sǝiou riwǝn irǝ mukurǝn, nǝnǝ mukurǝn raka mwi narǝien i narimnari me sǝiou rīpīk irǝ mǝpī raka iou. Nǝfe narǝien iakamarǝ irǝ, nǝri auǝr a mǝ nǝvegīnīen sǝnak rasori uǝ rouihi, uǝ nautǝ sǝiou rasori uǝ rouihi, mǝtǝ iakukurǝn pam raka narǝien tukwe mamagien a. ¹³ Ti nǝri nǝ mǝ Kristo rīmǝuvei pehe nīskaiīen sǝvǝnhi miou, nǝnǝ iakukurǝn narǝien ia narǝien me pam.^b

¹⁴ Mǝtǝ kīmīaha hiǝno noien amasan nǝpīn hiǝnasitu ia nirak ia nǝrǝhaien sǝ iakinarǝ irǝ. ¹⁵ Nīpǝrhīenīen, kīmīaha nǝkur Filipae hiǝuvǝukurǝn raka mǝ nǝpīn hiǝnamregi vi a nǝgkiariīen amasan sǝvǝi Kristo, nǝpīn iakīmǝier ia profens Masetonia, kīmīaha ǝpa hiǝnasitu ia nirak ia mane. Nakalasia me nepwīn ia kwopun riti mwi hǝiwǝn sǝ hasitu ia nirak. ¹⁶ Nǝpīn iakamarǝ ia taon nǝha Tesalonaeka rīpko mhǝ

4:11: 1Tim 6:6 **4:13:** 2Kor 12:10, 2Tim 4:17 **b 4:13:** Uǝ
“Iakukurǝn noien narimnari me pam.” **4:15:** 2Kor 11:9

nəpɪn kɜatɪa a hɪamərhi pɛhɛ manɛ miou. ¹⁷ Rɪpko mɪhə iakamətui manɛ mə tɪhəuvei pɛhɛ miou, mətə iakokeikɛi mə nasituɛn i səkɪmɪaha trukɜə kwənkwan, in nə Kumwɛsən trəgnəgɪni kɪmɪaha tukwɛ. ¹⁸ Iakɪməuvehi pam narimnari mɛ səməmɛ hɪənərhi pɛhɛ miou, nənə rəmwhɛn məpi raka. Nəpɪn Epafrotaetas rɪməuvehi narimnari mɛ muvɛhɛ muvei pɛhɛ miou, təkwtəkɜuni nəha narimnari mɛ səiou həuvəpɪk. Narimnari mɛ nəha hɪəməuvei pɛhɛ miou rəmwhɛn ia nəri kauvani ia təkurɛ nɪfatə nɪpɛkɪn rapɛɪn amasan kauvei pɛn m Kumwɛsən in ruvɛhi rɛrɪn ramagɪɛn tukwɛ. ¹⁹ Nənə Kumwɛsən səiou sə nautə səvənhi rasori, mauvɛhi nɪskaiɛn fwe ia nɛiai, in truvɛhi pɛhɛ m kɪmɪaha nəfɛ nəghɪn riwən tənɪ kɪmɪaha tɪ nəri nə mə hɪəməuvehɛ mɪhə kɜatɪa kɪmɪaha Iɛsu Kristo.

²⁰ Pwəh nəgnəgɪniɛn rɛvən tɪ Kumwɛsən Tata səkɪtaha ia nuk nuk mɛ. Ouəh, pwəh ro iamɪnhi.

Nəgkiariɛn sampam

²¹ Tɪhəni tukwɪni ramasan səiou rɛvən tɪ nərmama mɛ pam səvəi Iɛsu Kristo. Pɪəvtaha mɛ i kɪmaha mɪnraha, irəha mwi hənɪ ramasan tukumɪaha. ²² Nərmama mɛ pam səvəi Kumwɛsən ia kwopun i kamhənɪ ramasan tukumɪaha, nənə nərmama nɛpwɪn mwi səməmɛ kamhənɪ nɪpərhiɛniɛn ia Kristo fwe ia nimwə səvəi Kɪg Sɪsa kamhənɪ ramasan tukumɪaha. ²³ Pwəh namasanɛn səvəi lərɪmənɜ səkɪtaha Iɛsu Kristo tramarə tukumɪaha.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416